

Trend banjir tidak dapat dikenal pasti

LEDANG – Penduduk di kawasan pantai timur dan pantai barat diminta bersiap sedia menghadapi kemungkinan banjir memandangkan kini sudah memasuki musim tengkujuh.

Timbalan Menteri Sumber Asli dan Alam Sekitar, Datuk Ir Hamim Samuri berkata, trend banjir kali ini tidak dapat dikenal pasti, sama ada berskala kecil atau besar kerana bergantung kepada jumlah taburan hujan.

Menurutnya, jika taburan hujan melebihi 200mm hingga 600mm dalam musim hujan, maka banjir luar biasa boleh berlaku seperti di pantai timur pada tahun lalu.

“Bagaimanapun ramalan tepat tidak boleh diramal Jabatan Meteorologi disebabkan perubahan iklim dunia akibat fenomena pemanasan global pada masa ini.

“Ini sekali gus menyukarkan ramalan pergerakan angin dengan tepat yang ketika ini menyaksikan peralihan Monsun Barat Daya ke Timur Laut,” katanya.

Beliau berkata demikian selepas Majlis Penutup Kursus Pra Perkahwinan Parlimen Ledang di Kolej Kemahiran Tinggi Mara (KKTM) Ledang, di Serom 3, semalam.